



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 3



Ursula von der Leyen ano kumpungu EU tir inyaktüsü



Tanu Foreign Secy. Vikram Misri-i Bhutan semdangtsü

VOL. XXI ISSUE NO. 276 (ADOK 276) DIMAPUR ROGONÜ (FRIDAY) CHITENI (JULY) 19, 2024 ₹ 5.00

NLA senden ayonga aliba athir

Dimapur, Chiteni/July 18 (TYO): Nagaland Angh La Ganesan-i 14th Nagaland Legislative Assembly indang Session pongu buba August 6,

2024 nü jazüka June 3, 2024 nü sangdongba Angh-isa thitsüogo, ta Nagaland Legislative Assembly Secretariat sangdong ka ajanga metetdaktüsü.

NST Colony Dimapur nung nisung dak injang agi akhaba aitsür

Dimapur, Chiteni/July 18 (TYO): NST Colony, Dimapur nung aliba Ankit Transport indang staff züngsem ka dak prangbong bena alir mejangjaba nisung temi July 18, 2024 nikongdang tetsüng nung injang agi akhaba atema NST Colony nung alirtem, Churches Colony, NST Colony aser Middle Point indang Joint Council Forum (JCF) kanga mepelar aser temulung ani mesüngzükteter, ta sangdong ka ajanga ashi.

tatalokba kanga junga bushisüngdangtsü ajungshir aser aibelener nem tapet temerenshi agütsütsüla. Maneni nüburtem dang iba bushisüngdang nung yaritsüsa osangtsüsang kar danga ngutetra, arendaka melie ketdangtsür den osangtsüsang lemsateptsü ayongzüker. Iba ama tasü mait mapa atema asenok ajak külemi nokdakti, ta JCF ajangasa ayongzüker.

July 18, 2024 nikongdang Ankit Transport nung inyaker ka kanga sashia yirutsüba atema khukhua aitsür, ta NST Colony Council ajanga sangdong ka nung ashi.

Iba ama azüdokshi yangi onok mulung ani mesüngzükteter aser nüburtem tesendaktep anokshitsür. Ketdangtsür temi aibelener nem tapet temerenshi agütsütsü aser ozü nüburtem kumzüka ayutsü atema tapet mera tekeratiba nung agitsü akhanger, ta sangdong ajanga ashi.

Iba ama azüdokshi mapa inyaker ya asen lokti nung mayutsüla aser ozü jurisdiction nung yamala mapa inyaktüsü memelar. Nüburtem tetsübo makai alitsü asoshi onoki akang-akanga noksaktüsü.

Ketdangtsürtem dang iba tatalokba kanga junga bushisüngdangtsü ajungshir aser nüburtem dang iba bushisüngdang nung yaritsüsa osangtsüsang angazükra arendaka melie lemsateptsü ayongzüker, ta NST Colony Council ajangasa ashi.

Naga nungger ajunga lungjemer yimjung, akangjungshitep aser terenlok asoshi meranga inyaktepdang iba ama tatalokba yangi nüburtem mulungjang nung tetsübo tali adokdaktüsü aser teimla samadaktüsü, ta ashi.

Ozü jurisdiction nung iba ama azüdokshi onoki tatok magütsüteter aser magütsütsü. Nübur ajunga tetsübo makai alitsü asoshi onok pangjemba nung lungjemer nokdaka lir, ta JCF sangdong ajanga ashi.

Ketdangtsürtem dang iba

DNSU-i Dimapur nung sorkar inyakyim nung tenük yoktsü

Dimapur, Chiteni/July 18 (TYO): Sorkar mapa inyaker ajak dang pei mapa nung mapang shidak amshitsü aser bendanga agütsür inyaktüsü ayongzüker, ta Dimapur Naga Students' Union (DNSU) sangdong ka ajanga ashi.

agütsür asü masü ta jangjatsü mechi onoki district hospitals semdanga asadangtsü, proxy tesayur ayuba yimya indoker shisaliok tajung agütsütsü atema kaket rejutem semdangtsü aser terenlok maparen ochishia shidak inyaktütsü mechi development boards tem semdangtsü, ta DNSU sangdong ajanga ashi.

Tajungtiba nung nübur anidaktüsütsü, shisaliok agütsüdaktsütsü asoshi onok temulungtetba nung lir aser stakeholders ajunga nungi amalitep alitsü imlar. Aibelener nem DNSU office nungi ozüing agi mela aliba mera agitsü. Nübur tenzüka nung ochishia tajungtiba nung inyaktüsü yimya sübatsü külemi inyakti. Aser asenok külemi inyakba ajanga governance system tajungba akumtsü aser Dimapur nung aliba nüburtem ajangzüktüsü ta amanger, ta DNSU sangdong ajangasa ashi.

Dimapur nung tenzüktüsü ya maongka tulu lir, aser yangji ochishia mapa shidak inyaktüsü dena lir.

DNSU-i wadang asem, Education, Health aser Development nung tali rangloktüsü. Tematiba jenjang nung sorkar mapa inyaktütsü mechi onoki mapang shia Dimapur telungzüker aser temeket nung sorkar office ajunga aoksa semdangtsü, talisa district hospitals, kaket reju aser development boards tem nung rangloktüsü. Anungji employees temi pei mapa shidak inyaka dangaria anidaktüsüsa tatishtüsü tajung yutsütsü imlar, ta DNSU ajanga ashi.

Talisa healthcare service tajung

DoSE-i math & science tesayur 138 shimtsü inyakteptar: Yhome



Advisor, School Education & SCERT, Dr Kekhrielhoulie Yhome-i Brehostibarnü Rüzühkhrie Government Higher Secondary School (RGHSS), Kohima nung higher secondary streams asem atema yanglua aliba ki tasenba semzüktüsüba mapang tangokba noksa nung angur.

Kohima, Chiteni/July 18 (TYO): State nung mathematics aser science tesayur agi anünga aliba atema Department-i tesayur 138 shimtsü maparen tenzüko, ta Advisor, School Education & SCERT, Dr Kekhrielhoulie Yhome-i Brehostibarnü metetdaktüsü.

Rüzühkhrie Government Higher Secondary School (RGHSS), Kohima nung higher secondary streams asem atema yanglua aliba ki tasenba semzüktüsüba mapang, "Angati shisaliok agütsütsü ya sorkar mapa lir, anungji state nung aliba school 1939 ajanga tajungtiba inyaktüsü meranger," ta Dr Yhome-i ashi.

Tang state nung government higher secondary school 53 lir aser tarutsü nung ano tali amenoktsü, kechiaser Government of India-i college kata nunga Classes 11 aser 12 melidaktüsütsü totuy8uba agüja lir, ta pai ashi. Taoba küm state nung colleges 15 nungi Higher Secondary level agien aser yangji Kohima nungi tenet lir, ta ashi.

"Onoki government school nung math aser science tesayur 138 shimtsü atema maparen

inyakteptar aser iba ya ajanga department konang samar aliba tanaben angutsü imlar," ta Yhome-i ashi.

Mon district nung shisaliok tsütsü asendenshi angur, kong class 10 ajanger kaketsür 1439 liasü aser parnok aikabo pei district alemotetsüsa akum, anungji department-i primary school ka upgrade asü aser higher secondary lapok, ta ashi.

RGHSS indang building tasen semzüka ya otsütsütsü anogo ka lir, kong kaketsür 940 den tesayur 70 aser danga staff 14 lir, ta Advisor-i ashi.

RGHSS ya tsüinglanglen aliba GMS den lokteper Classes A nungi 12 tashi composite school ka kumdaktüsütsü atema department-i inyakteptar aser iba ya ajanga tashi tali ita tatishtüsü aketba school ka akumtsü imlar, ta Dr Yhome-i ashi.

1941 küm asüba GHSS Kohima ya heritage building ka kumdaktüsütsü atema department-i lenba-lenre bushitar, ta pai metetdaktüsü.

Company atema iba dang CSR - Corporate Social Responsibility ta ajar saka Naga nungger atema ibai Community

Support Resources alitsü, anungji asen nüburtem tejak leni arua pei aliba yimsüng aser tesem nung sorkar reju yaritsüla, ta ashi.

RGHSS indang Senior Principal Lebu Krose-i pela agizükba o jembidang, building tasenba nung Arts, Commerce aser Science streams azüngba higher secondary kaketsürtem atema takdang 16 lir aser staff rooms aser metzü meshiba tesemtema lir, ta ashi.

Laisa Advisor aser Department ketdangtsürtem dang British nungger mapang yangluba RGHSS ya kanga junga anepalua heritage kumdaktüsütsü ajungshia liasü.

High School Panchayat indang chairman Atoulie Mepfhuo-i iba sentong nung tajungshi o jembia liasü.

Iba sentong nung Post Graduate Teacher Yekatoli menden liasü, Pastor, Peraciezie Baptist Church, Rev. Dr. Kevichalie Metha-i sentong tenzüka sarasadem, school choir ajanga temeja ken ka aten aser RGHSS vice principal Sedengunuo Mary Solo-i melepzüng o jembia liasü.

MMC shopping complex nung dokan rungtokertem nem MCCI-i teyari agütsü

Mokokchung, 18th July (TYO): Mokokchung town nung otsü asütsüsa kodanga matalokdangba kitsük kirung lendong tulu ka küm tetenzüklen 3rd February, 2024 aonung ajurua liasü. Ibaji Mokokchung Municipal Council shopping Complex nung atalok aser iba aonung dokan 59 metsüngrepa rungtok aser dokan 30 dak tali teraksa ajurua liasü.

Item dokan rungtoker nem teyari agütsütsü asoshi Mokokchung Chamber of Commerce and Industry (MCCI)-i 'fundraise' sentong ka ayongba den temulungertem nungi senotsü bendentsüba ajak senteper sen 6, 76,700/- (six lakh

seventy six thousand seven hundred) saruteta takoksa ajurur nem 18th July, 2024 nü MMC conference nung sentong ka agia amoktsüogo.

Iba sentong nung MCCI tir, Tsükti Longkumer-i jembidang, iba sen ya 'nenok takoksa ajuruba alang temenok agütsürba masü, saka nenok timtem nung MCCI-a dena lir ta temeim sayurba dang, anungji, pelashishia agizüktsü mepishir', ta metetdaktüsü. Iba teyari ya yakta agütsütsüba asü saka koda masüba kar denjia menur agütsüba asoshi sasaba olen ka ashi.

Lendong mapang nisung taküma samar, saka asenokbo mi

lendong tulu atalokaka tasü-tama kecha majuruba asoshi Tsüngrem dang pelar. Iba kirung lendong dak sentakba nung mezüing anogo nungi MCCI-ia maparen balala nung yaritepa arudar aser ano maneni yariteptsü mulunga lir, ta ashi. Takoksa ajururtemi teimla mesamai ano pei wadang maneni meranga inyaktüsü MCCI tirisa ajungshia liasü.

MCCI-i teyari agütsüba Rs. 6, 76,700/- nungi dokan rangben rungtoker nem Rs. 4,50,000/- aser terara raksar nem tanüngba Rs. 2,26,700/- ji lemsar agütsü. MCCI-isa lending mapang aria bilem sayua tenla agütsür ajak dang pelaba lemsatep.

Rüzhühkrie GHSS Kohima atema bus service agütsü



Advisor for School Education and SCERT, Dr Kekhrielhoulie Yhome-i Rüzhühkrie GHSS Kohima bus service tenzüksüba noksa angur.

Kohima, Chiteni/July 18 (TYO): Rüzhühkrie Government Higher Secondary School (RGHSS) Kohima nung Brehostibarnü bus service amenokogo, koba talisa kaketshirtem atema asütsü.

Iba bus ya Ministry of Education indang public sector undertaking EdCIL-i parnok indang Corporate Sector Responsibility (CSR) kübok tenla agütsüogo. Bus ya Advisor for School Education and SCERT, Dr Kekhrielhoulie Yhome-i Directorate of School Education nungi tenzükja liasü. Iba sentong nung department aser school nungi ketdangsürtemi shilem agia liasü.

Sentong nung o jembiba mapang Yhome-i ashiba agi, RGHSS ya Nagaland nung mezüngbuba sorkar school lir, koba 1941 küm amenok aser kümtem tsüingda iba school nungi lenir aika aser Naga nunger rongnungi tongtibang nisungtem aika anitetogo.

Paisa, school aika nung bus nüngdaker saka tia ka RGHSS nem bus ka agütsüogo aser iba ajanga kaketshisatsü atema bendanga agütsür aliba tali sayutsü. Onoki company balala den CSR fund atema inyaktepdar aser EdCIL dang iba tenla agütsüba atema kanga pelar, ta ashi.

Yhome-i ashiba agi, state kübok school tem aika küm aika tejakdang yanglubatem lir aser item school tem ya techireper dang lir, ajisüaka infrastructure tajung agütsütsü atema sorkar kanga timtema arudar. Anugji pai Directorate nung Community Resource Support cell ajanga school infrastructure jenjang ajungkettsütsü atema kija aser lokti tem dang tejakdangi arua shilem agitsü ayongzüka liasü.

Kasa mapang nung okila jembiba mapang Principal Director of School Education, Thavaseelan K-i ashiba agi, EdCIL-i bus tenla agütsüba

dang masü saka department-i school 190 nung subject balala aser talisa math aser science subject nung live online class tem ayongzüka agitsü atema parnok den sensaksemogo.

Bus ya CSR nung shilem ka ama agütsüogo, ta pai ashiba den state ajunga nung school infrastructure tem ajungkettsü atema CSR tali angutsü asoshi department-i inyakdar ta shisem.

Paisa, sorkar school 55 nung nung solar electrification atema CSR asoshi inyaktepdar aser ano school 670 kong electricity mali item school tem atema-a jenjang agitsü, ta ashi.

SCERT aser NBSE atema curriculum balala yanglutsü aser tesayurtem sayuba jenjang ajungkettsütsü atema department-i inyakdar, ta pai ashi.

KABA Pastor Rev Sentsashi Aier-i iba bus bendanga agüja sarsademja liasü.

KVK Mokochung-i FLD training ayongzüka agi



Dimapur, Chiteni/July 18 (TYO): Krishi Vigyan Kendra Mokochung-i, tzülu ayimba dak sendakba nung FLD training ayongzüka agiogo. Front Line Demonstration ya Kendra tinyaktsü maparen ka lir, kong kuli tejanga nguteter aliba agricultural technology tem angazüka inyaktsü atema aluyimertem dang sayur.

Yamaji July 10 aser 17 nü Aliba aser Kinunger yimtsüng nung aluyimertem dang biofertilizers aser azolla dual cropping dak sendakba nung Front Line Demonstration ka sayuogo. Training ya Imtisenla (ACTO- Agronomy) aser Imtilemla (ACTO-Soil

Conservation) nati agüja liasü. Training mapang aluyimertem dang tsünüsenpongtsü tajungba adoktsü atema tawa tapet toktsür tarensena atemtsü ajungshi aser tsünüsenpongtsü tem teyaraba adokdaksütsü atema nursery nung ali kanga junga anepalutsü tangazükba agüja liasü.

Maneni Azospirillum, Phosphate aser Potassium amala biofertilizers tem amshiyim sayu aser iba technology amshiba ajanga tajangzük aika anguba indang metetdaksüba den aluyimertem nem biofertilizers

aser extension folders agüja liasü.

Azolla den külemi alu ayimba indang technology aser tsük timba arutsü atema transplant asüba sülen mo dak sendakba nung live floating nitrogen fixing factory ka sayua liasü.

Azolla ya tzüinglu aruba mapang kanga kar renlokyonga aoer aser iba ajanga aie adokba azüoker. Iba dak alia an, anogo, nashi chang atema Azolla amshiba aser azolla compost nunger indang tangazükba agütsü.

Ajak senteper aluyimer 17-i iba training sentong nung shilem agia liasü.

Shamator-Chessore lenmang merketetogo

Dimapur, Chiteni/July 18 (TYO): July 18 nü tashi nung Shamator-Chessore lenmang Y. Anner yimtsüng tashi merketetogo. Tzüinglu kanga aruba ajanga anentsü agi iba lenmang nokdang liasü aser Advisor Youth Resources & Sports, Keoshu Yimchunger, Executive Engineer, (Roads & Bridges) Tuensang, Er. Thongpang Chongshen-i anir Public Works Department aser SDO (R&B) Shamator, Er. T. Azhiba Yimchunger spot officer ama parnoki achaayanga iba lenmang merketetogo.

Iba dak sendakba nung Chairman Y. Rikhum-i anir Y. Anner Village Council-i, lenmang mapang tatsüka tsüingda merkettsüba atema Executive Engineer, (Roads &

Bridges) dang kanga pelaba lemsatapa liasü. Parnokisa SDO (R&B) Shamator danga kanga pelaba lemsatap. Maneni Village Council-i, tzüingluruwa mapang nüburtem timtemba bentettsütsü asoshi sorkar aser ken o dak sendaka aliba department temi maneni inyaktsü imla ataba lemsatap.

Kasa mapang nung council-i, local MLA and Advisor, Keoshu Yimchunger-i nüburtem atema kanga süokia bilemba aser talisa timtem ataloker aliba mapang nüburtem nem teyari agütsüba atema kanga pelaba lemsatap.

Tang NPWD-i teyari agüja Y. Anner yimtsüng temeket nung excavator kati lenmangtem merkettsüdar.

Yingli College Economics dept-i extension service ka ayongzüka agi



Dimapur, Chiteni/July 18 (TYO): Yingli College, Longleng Department of Economics-i July 18 nü Yongam yimtsüng nung tetsürtem atema extension service sentong ka ayongzüka katsüogo. Item tetsürtem ya timba Longleng jila nung aonsotsü ayokertem lir.

Iba sentong nung faculty züingsem, Dr. Chubakumzuk Jamir, Lochumbeni P. Shitiri aser Konchem nunger den 5th semester major kaketshirtemi shilem agia liasü.

Sentong nung shisalen

sayurji Konchem, HOD liasü aser lai marketing skills aser business ethics onük nung ajemdaker tangazükba agütsü. Laisa, mapang talangka shishilembatsü, tajungyimi tokteptsü, shishilembaba mechirepi inyaktsü aser talirtem temulunglemteta kümdaktsütsü atema ochishiba, odangtetsüsa inyakba, ajak den kasa inyakba, khuret abenba aser ozüing shitak beshiba amala yimyatem ya shishilembaba, production aser tsütatepba mapang kanga tongtibang lir, ta ashi.

Chumoukedima DPDB senden menogo

Dimapur, Chiteni/July 18 (TYO): July ita atema Chumoukedima District Planning & Development Board (DPDB) senden July 18 nü DC Conference Hall, Chumoukedima nung menogo.

Senden nung o jembiba mapang Advisor, Industries & Commerce, Hekani Jakhalu-i ashiba agi, Chumoukedima ya district tasen ka lir aser maongka tajung aika lir aser sentong tasentem benoktsü atema ketdangsürtem dak keta lir, ajata asünungdang district-i tanga district tejentem dang nungi tajungba inyaktetsü.

Laisa, Nagaland nung tebilemstü tulutibaji Sustainable Development Goals (SDG) lir ta shia department balala

ketdangsürtem dang state indang SDG ranking ajungkettsü atema longjemer inyaktsü ayongzüka liasü. Maneni lai board züingsemtem dang team ka ama inyaka Chumoukedima district ya tejakdangi aoba district ka kümdaktsütsü ajungshi.

Senden nung house-i Emerald School, Chumoukedima aser V Movi Institute of Fashion Designing züingoksemstü atema sensak asem aser züingsemtemi iba onük agizüka liasü. House-isa Ghaspani -II A/C atema LADP 2024-25 sensaksema agizüka liasü.

Iba senden ya SDO(C), Chumoukedima, Chumbenthung Murry-i tepela antiku o jembiba sülen tembanga liasü.

NEET-UG Paper leak ken o nung CBI-i AIIMS Patna nungi student 4 apu



July 18, 2024 nü New Delhi nung Supreme Court-i NEET paper leak ken o angadanga mapang nung kaketshirtemi longkak aitdang tangokba noksa nung angur.

New Delhi, July 18 (Agencies): NEET-UG question paper leak asüba ken o dak sendakba nung Brihostibarnü Central Bureau Of Investigation (CBI)-i AIIMS Patna nungi MBBS student pezü puogo, ta ketdangsertemi metetdaksü.

CBI-i Third-year MBBS student asem-Chandan Singh, Rahul Anant aser Kumar Shanu nung den second-year student ka, Karan Jain nung dang asüngdangyaba sülen parnok ajak apu.

Osang angazükba agi, MBBS student pezüji Bodhbar aonung parnok indang hostel room nungi aniteta liasü.

Tamalen AIIMS Patna nung

tesayurtemia NEET-UG paper leak ochimashi ken o nung parnokia shilem agia lir asü maliar bushisüngdangtsü nüngdak, ta metetdakja liasü.

CBI-i par pezüprong indang hostel takdang shibangja lir.

AIIMS Patna Director, G K Paul-i, "CBI-i student pezü puogo. Chandan Singh, Rahul Anant aser Kumar Shanu nung den second-year student ka, Karan Jain nung dang asüngdangyaba sülen parnok ajak apu. Paisa, senior officer kati CBI nem item students indang noksa aser mobile numbers agüja liasü, iba sülen CBI team-i dean, hostel warden aser Officer on Special Duty to Director nung lia kaketshir pezüji puer ao, ta

metetdaksü. Hazaribagh nung NTA trunk ka nungi NEET-UG paper auyaba ken o dak sendakba nung tamalen National Institute of Technology Jamshedpur nung azünger civil engineer, Pankaj Kumar nem tai tonglokja pua liasü. Kumar ya Bokaro nungi lir aser tang pa Patna nung CBI ket nung lir. CBI-isa Kumar den yaritepsang, Raju Singh-a puogo.

Medical entrance exam nung ochimashi ken o ya CBI-i bushisüngdang, tang tashi nung parnoki FIR trok benoka lir. Bihar nung benokba FIR ji paper leak indang lir aser tanga FIR ji Gujarat, Rajasthan aser Maharashtra state tem nung candidate-i ochimashiba indang lir.

Bangladesh nung India sensotem dang kümdangtsü metetdaksü

New Delhi, Chiteni/July 18 (Agencies): Tang Bangladesh nung longkak aita tensa mejungi aliba mapang Dhaka nung aliba Indian Embassy nung ketdangsertemi India nung sensotem aser kaketshirtem dang pei kidang nungi ayazüka maotsü tekümdangtsü metetdaksü.

Indian Embassy nung ketdangsertemi, "Tang Bangladesh nung tensa mejungi aliba dak sendakba nung Bangladesh nung alir India nungertem aser kaketshirtem dang ainlen mesenziüsü aser pei kidang nungia mayazüktsü tekümdangtsü metetdaksür," ta metetdaksü.

Bangladesh yimtiba, Dhaka nung nung Indian High Commission-ia rongdak mapang

tongteprateptsü aser teyari meshitsü atema India sensotem nem helpline numbers agütsü.

India nungertem atema Emergency Helpline numbers ji: High Commission In Dhaka - +880-1937400591, Assistant High Commission Of India In Chittagong - +880-1814654797/ +880-1814654799, Assistant High Commission Of India In Rajshahi - +880-1788148696, Assistant High Commission Of India In Sylhet - +880-1313076411 aser Assistant High Commission Of India In Khulna - +880-1812817799 lir.

Item number nung Whatsapp ajanga-a tongteprateptsü akok.

Mongolbar nungi tenzüka Bangladesh nung kaketshirtemi

longkak aitdang tang tashi nung kaketshir trokbo sü.

Linük tesem ajaklen University aser college students-i sorkar dang sorkar mapa nung reservation inyakim agentsüla, talisa 'war heroes quota' agentsüla, ta akhanger. 2018 küm Ato kilonser, Sheikh Hasina-i reservations inyakim ajak agiena liasü saka Bangladesh Supreme Court tetuyuba nung ajemdaker taküm June nung tanaben asentenshir reservations inyakim benokba sülen kaketshirtemi longkak aiter.

Linük tesem ajaklen longkak aita ajanga school aser colleges ajak shibangtsü tetuyuba agüja lir.

KODANGA MAMATETBA JABASO (TOSHIMANEN)



Asoba küm - 1987
Asüba küm - 19.07.23

Iba akümüli wadang toktsür teti taküm maka anizüngzük daki Tsüngremi anir ogo. Onoki na teti temolung nungi mepilar aser mamatetter. Kenübo asenok ajak ajuruteptsü aji onok sarasadem. Na menemjemi ataa liang.

- Ne temeim Oja aser adianutem.
Salem .

OFFICE OF THE MERANGKONG ADHOC TOWN COMMITTEE

No. ADC Tuli/LR-4/PT/95-96/139
P.O. Tuli Town - 798618, B.P.O - Meran gkong
Dist - Mokokchung: Nagaland.

KONANG TETUSHI AGÜTSÜR

Merangkong Town nungi jabaso tajung Mr. Yarmen Yaden, Mr. Talinungsang & Mrs. Rendinaro tena jabaso, St. Joseph's College (Autonomous) Jakhama, Under Graduate tatitang (Department of Physics) nung gold medalist jenjang ajangzükba asoshi Merangkong Adhoc Town Committee aser nuburtem ajaki konang tetushi agütsür. Tarutsü nung pa azüngba aser inyakba ajak nung Tsüngremi temjena moaja len aniang ta asen teyanglur Tsüngrem dang temoatsü meshia sarasademtsür.

(I. MEJA YADEN)
Vice - Chairman
Merangkong Adhoc Town Committee

(SASHIMEREN)
Secretary
Merangkong Adhoc Town Committee

Tanü Foreign Secy. Vikram Misri-i Bhutan semdangtsü

New Delhi, July 18 (Agencies): Foreign Secretary tasenba, Vikram Misri-i Hokolbar nungi tenzüka anogo ananü Bhutan semdangtsü.

Bhutan yimtiba, Thimphu nung Misri-i Ato kilonser Tshering Tobgay, Foreign Minister DN Dhungyel aser Foreign Secretary Pema Choden nung ajurutsü, ta Ministry of External Affairs (MEA)-i sangdong ka ajanga metetdaksü.

India sorkar indang 'Neighbourhood First' policy kübok pai Bhutan semdangtsü.

Misri-isa Bhutan Chuba, Jigme Khesar Namgyel Wangchuck-a ajurutsü.

Misri aser Choden na senden amenba mapang nung tenati linük ana tsüngda tesendaktep kübok lenla balala asadangtsü.

"Bhutan semdangba mapang Foreign Secretary Misri-i Bhutan Chuna ajurutsü. Pai Ato kilonser,

minister of foreign affairs & external trade, foreign secretary aser Bhutan sorkar tongti ketdangsertem aika ajurutsü," ta MEA-i metetdaksü.

Linük ana nungi foreign secretary ana leniba nung India-Bhutan development cooperation senden amentsü, ta MEA-i metetdaksü.

Taoba ita Narendra Modi Ato kilonser tenangzükba agiba sentong nung Bhutan Ato kilonser densema India's neighbourhood aser Indian Ocean region nung aliba linük tenet nungi tongti lenirtem densema liasü.

China aser Bhutan na tsüngda arrtsü dak sendakba mangatettep adoka aliba mapang ka nung Misri-i Bhutan semdangtsü.

Item ter tejaklen China yimtiba, Beijing nung Bhutan nung taoba Foreign Minister Tandi Dorji-i China Foreign minister, Wang Yi na senden mena liasü.

J&K kübok Kupwara nung kiralongrar ana khaset

Srinagar, July 18 (Agencies): Brihostibarnü Jammu & Kashmir kübok Kupwara district nung aliba Line of Control (LoC) anasa security sepaitemi kiralongrar ana khasetogo.

Brihostibarnü Keran sector kübok LoC anasa sepaitem aser kiralongrartem tsüngda khatetp tenzüka liasü aser tang tashi raradar, ta ketdangsertemi metetdaksü.

Brihostibarnüsa Jammu & Kashmir kübok Doda district nung kiralongrartem den khatepdang sepai kata yiruogo. Nikongdang 2:00 ako meta Jaddan Bata yimdak khatetp tenzüka liasü.

July 16 nüa Doda district nung kiralongrartem den raradang Army officer ka densema sepai pezü

khaseta liasü. Iba rara nungji Captain Brijesh Thapa den Naik D. Rajesh, Sepoy Bijendra aser Sepoy Ajay nung asü. Iba sülen sepaitemi region nung kiralongrartem mita ao tenzüka liasü.

July 16 nü sepaitem amakbaji "Kashmir Tigers"-i liasü. Iba telok ya Pakistan-i pusemba kiralongrar telok Jaish-e-Mohammad (JeM) nungi jakzükba lir.

Tesüiba hopta ishika Jammu and Kashmir nung kiralongra tatalokba kanga bulba sülen sepaitemi tesem aika nung kiralongrartem mita odar. July 14 nüa Indian Army-i Kupwara district kübok Line of Control (LoC) nung kiralongrar asem khaset aser July 6 nüa Kulgam district nung sepaitemi kiralongrar trok khasetogo.



July 18, 2024 nü Bengaluru nung Karnataka BJP Tir, B Y Vijayendra leniba nung party lenirtemi Karnataka Maharshi Valmiki Scheduled Tribes Development Corporation Ltd. nung ochimashi liasü, ta tai tonglokja Chief Minister Siddaramaiah dang menden nungi anentsüla, ta takhangba agüja longkak aitdang tangokba noksa nung angur.



TIR YIMYIM YIMOBILEM (EDITORIAL)

DIMAPUR ROGONÜ, JULY (CHITENI) 19, 2024

Kechiba mapai mouner ?

Nagaland nung Naga nungertem rongnung peisasa A,B,C zülutetsüsa aser 1,2,3 züngtetsüsa metetba nisungtem ajaki alemli nungi tanü tashi government mapa bushir. Ajisüaka, Nagaland nung tang tebilemtsü tulutibaji, jungjunga reprangdangra, government mapa bushirtem government mapa manguba tebilemtsü masü saka government mapa ngua inyaker ser nung mapai maoba tebilemtsü lir ta reprangtetsü. Atangji, government mapa inyakerkem aika asoshi mapai moi ita sen agizüka agitetbaji temoatsü ta bilema Tsüngrem nema ter shilem shitak agüja pelashishia lia alitsüa akok saka nübortem asoshi ibaji takoksa aser timtem tuluka akümer. Iba tensa tia ya kodang bilemdangdir, mapai maotsü atema mapa bushirtem to nübortem tenzüksü atema masü saka nübortem timtemdaksütsü asoshi mapa bushirtem liasü ta angatetter. Atangji, Nagaland nung ya tangar lima nung mataloktetba tesümangtsü mapa aika ataloker aser item tesümgangtsü mapatem rongnung government mapa inyakerkem mapai mao ita sen chia nübortem dang ochishia alitsü sayutsüngia jajaba mapatem ya ka asütsü. Aji oda, Nagaland nung government mapa inyakerkem kar government ita sen chia office-i mao sayutsüngia jajar, kar pei lu inyaker, kar business inyaker aser kar politics asayaa jajar ta ita sen achirbo aika saka mapaibo maor ta ochi ji kechiar mejangjaba lima Nagaland kümogo. Iba jagi tanü lanurtem aser kaketshirtemi Nagaland tesem balala nung government mapa inyakerkem dang mapai arutsüla ta akangba angor. Ibaji tanurtemi tsürabur arütsüba aser ajungshiba mapa ka lir. Nisung koda masü shiranger saka mozü kidang nisung mali, kiset shirurtem remtema süteper saka shiruru mozü ki melapoker, tanurtem kaketshidaki aoer saka tesayurtem marur, nübortem yimtak yimtsüng nungi certificate ka nüngdaka arur saka office nung shinga mali. Akhi mapangbo government mapa inyakerkem mita reprangtsü asoshi Inspector liasü saka tanübo Inspector agi Officer melener, shibai shiba reprangar mejangja kümogo. Ashiko, Officer ta asüba ojang ya asen oshi nung meyipzüker jalasang, officer jagi pei mapa meteta nübör tenzükla ta bilemer. Delhi nungi aser Kohima nungi tonga aruagi anepalu junga mesütetba agi pei meyong piesasa meima anepalutsü atema "Communitisation" sentong tenzük saka asenoksa tesangrabaji, asenok o asenok na tangatettep nung 'proxy' nisung ayur aser tanga nüngdak atema yokba sen tangatettep nung mapa meinyak ser agizüka achir. Aji oda, asenokbo takoksa nung anaben ta asütsüsa, government mapa inyakerkem aika mapai mao ita sen achir aser government mapa meinyakerkem aikati mapa meinyak ser sen agizüka achir. Iba jagi Nagaland ya mapai mao aser mapa meinyak sen ngua takar akümba lima ka kümogo. Ajisüaka, mapa meinyakba aser mapai maoba sen agi takar kuma jangratema alibaji tajung tazü masü, iba jaangratem aser tepelaji shitakba tepela aser temoatsü masü, itemji ajep menümenür amato asütsü. Koba Tsüngremibo nübortem memeim, metenzük aser anepalu masü sür, iba indang sen agizüka agiba tsürabur aser chirnurtem dang pelatsü ? Koba Tsüngremibo sensakerkem meyong oset, chiyongtsü, mozü, kaket, süoshi aser teyaritem parnok nem magütsü ser pei meyong kuma takar akümba purtem dang pelatsü ? Koba Tsüngremibo nübortem meyong tagitarutsü parnok nem magütsü ser bendenba rongsen nungi tenla agütsüba agizüksü? Alima nung jangratema alitsüba mapaji mapa inyaka alitsüba ya dang lir. Asenok aikati mapa meinyak ser jangratema alitsü amai bilemer, saka mapa meinyak ser jangratema alir iba lima nung shinga mangutsü ? Mapa meinyak ser jangratema alir kar danga lira, itemjibo akhi masü ! Parnokjibo kopi melii mali akümstsü, kechiyong alima nung mapa meinyakibo melitetsü. Mapa meinyakra chiyongtsü dang masü tepelaa mangutsü aser anema aliba taküm tajunga majurutsü. Mapabo bushir saka kechiba mapai mouner (?) ta asenokbo jungjunga khi shisadangdi. Tsüngrema mapa nung dang dena lir, anungji mapa inyakerkem dang Tsüngrem tashia angatetsü. Joko, mapa meinyaktsübo mapa mebushili aser mapai mao ita sen agizüka agiba yabo temoatsü masü chirnur aser semchirsemnur tashi timatemtsüba atakatem bendentsür ta angateta, mapai odi mesüra mapa nungi anendi.

OLEMSABANG

DIMAPUR GOVT. COLLEGE AO KAKETSHIR TELONGJEM
SOBALIBA SENTONG
APRIL 13TH, 2024 NUNG JEMBIBA
O JEMBIR: L. SOSANG JAMIR, D.C. (JUDICIAL) RTD.

(Yashi adok nungi...)

Kisen Ki ji ita anogo tajung taksür ang asütsü. Ki ji anogo ka nung sa renemtsü tim. Kechiyong Ki ji menermdang Yimdak tasü tama adokra mesüra kitsük kirong adalokra aji majung ta taksür.

Kodang kiyimla aser kiyimsang na kibong kumdir, benjong tulu alir, saka iba mapa yabo "Tembo o Ase" na di dang ajayanger. Ano Tembo I Piya chibo ka (pot of local rice beer) aser Ase I Pojilen (trivet) asem den tzüshi asem da bener arua yutsütsü.

Ki tasen akumdang tesürlar Elangtsür I meiner arutsü aser parnok rongnung tantsütila I khu ka nung TAKRASULEMTSÜ (weaving tools) enoka bener par elangtsür ken tena meiner arutsü aser parnok ajak nem Mapok chi (sticky rice) chitem nung Shi pangtem tena enoker akatsütsü. Iba mapok chi jaki Kinungtsü Kinungbo na takum tepiyong palatepa alitsü tamaitü sayuba lir.

Aji sür kelen Kiyimsanger Kin nungi tambor ka shiba jabaso aieka lir, pai An tipong ka bener arua yangji tsü-ettsüstü. Iba an ji pai yamai ayimtena tsü-ettsü, "O apou- ani takum arr shia aoulak ama talang songtema temjena lidakjangne, Chinur jenti moajangne" ta mepishitsütsü. Ajisür An tar agitetta par kibong tia reprangtsü. Iba aonung par kibong tasen akumdaki Aor ajaki par kibong atema pumang takzüksü. An ji kiyimsanger Kidong nung Sungpor tanubosang anadi bener oa achitsü.

Yamaji asen Aor kipalembu ya kanga temeruk, teyintang aser mapa ajaak asungtetta dang benschia aru.

Tena lia oadang, tena rongnung teborsangi mesüra tetsürlai pei kinungbo mesüra pei kinungtsü anema tangar den nüktapangra, shibai aeibelen pa/la dang Ak ka senchi achitsü. Iba dang "AZU-MET yim" (Chungle) aser "TURATSÜOK" (Mongsen) ta ajar. Saka tenaji sa lira senchi Ak 7 mesura 10 tashi achitsü, koba dang KILAMET ta ajar. Ano shibai iba ama mapa tamajung inyakerkem pa/la nem rongsen kecha magütsütsür saka kanga mezümgmeshia dang yoker.

Ao sobaliba agi item amala kin den lembutsü ashipanger:

1. Noklenmendang Tetsü- Tebo mapang kin ana tsüngda raratepba Azü dokshia tejashitep atalokba ajanga kin anaji kipalembu mesüteter. Anungji iba ama tia ka nung lia arudang shiri Yamala den kipalembudir, pa taküm, kibong nung mazükmaro ataloker. Aji agi item Kin den kipalembu masür, kechiyong iba ama timtemji asen tamang agi makoker.

2. Adianu tsüngda lembuba - Ibaibo Aor Sobaliba nung temenen tulutiba, kechiyong parnok Azü (blood) ka dang lir. Anungji kodang nisung kati pei kin tsür mesüra tebor sanger Kin den nüktapangtadir iba temenenji pongdoktsü atema yimkong anogo ka yim süngkum shipanga menen mong amongtsü. Iba anogo nung nisung shingai kecha mapa meinyaktsü mesüra süngjanglijang kecha mazüngtsü. Bendanger tem a maniyoktsü. Iba anogo putir kati Ak chanü "Tesü" (Cryptorchid) ka tetsüng pezü prongla alener ibaji süng ka rüoker aji pa tapu nung apur yimdong sema senzütsü. Pai yamai ayimtsü "tanü menen mong amongbai tatem südakjangne. Lanur shinga daka yamai tatalokdaksü" ta ayima "Ak ya agi temenen ajak pongdokjangma" ta atakatemtsü aser yim mangkoterong nung Akji tepseta aji pa achitsü.

Aji sür Yimsüsur temi tena dang Ak ka ka achitsü. Saka ano tenajisa lira tena prongla yimyak nungi küm tenet (7 years) atema aridoktsü. Saka iba mapang nung tena balara mesüra ka süadokra, taküm alisang /alilaji pei yimdaki meyipa arütsü akok. Saka teborsangbo yimten yimli kecha nunga aniochtsü makok. Aji Ao Sobaliba.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Mission Aviation Fellowship aser Mercy Ships na longjemshiogo



Africa Mercy Ships team ka noksa nung angur

July 18, 2024: Tawa Khristan medical charity telok ana-Mercy Ships aser Mission Aviation Fellowship (MAF) nati maneni longjemmer inyaksü asoshi tezüngzüktep tasen ka agishiba ajanga Africa tesem aika nung timtemertemi medical teyari angutsü.

Mercy Ships aser MAF nati 2014 nungi 2016 tashi longjemmer inyak aser maneni tawa Madagascar nung telok anati maneni tezüngzüktep tasen ka agishiogo.

Khristan organisation ana yagi Liberia nunga longjemmer inyaker.

Mercy Ships ya rong tulu nung hospital amenokba lir, aser item rongtem nung sub-Saharan linüktem nung alirtem angati surgery agitsüba den külemi

healthcare services agütsür.

Mission Aviation Fellowship-ia teyari balala agütsüba ajanga Mercy Ships team-i Madagascar nung kanga tezülen aliba tesemtem-a tonga oteta Mercy Ships teams aser shirangertem belenshiba nung yaritsü.

"Madagascar nung gari lenmang nung senzütsüji kanga tasak, kechiyong kanga tenem aliba tesemtem nung gari lenmangtem junga mali," ta MAF Madagascar Country Director, Michael Jurgensen-i metetdaksü.

Paisa, "Gari ajanga kanga tezülen aliba yimsüngtem tonga aotsü atema anogo aika agir, aser ibaji ajanga mapang aser tashi tali indoker," ta metetdaksü.

"Ajisüaka MAF Madagascar teyari ajanga Mercy Ships nung patient selection team-i mapang tatsüka tsüngda kanga tezülen aliba tesemtem tonga otettsü," ta pai metetdaksü.

World Health Organisation (WHO)-i ashiba agi, Madagascar nung nisung 100,000 shia atema doctor kaka dang atar, ibayongji nisung aikati mapang shidak nung surgical treatment magiteter.

MAF Africa Regional Director, Bastiaan de Waal-i, "Onok indang tayimtsü ajanga Mercy Ships team züngsemtem Madagascar nung kanga tezülen aliba tesemtem tashi anir aoba ajanga onoki surgical teyari nungdakertem aika yaritetsü aser teimla agütsütettsü," ta metetdaksü.

Indonesia nung küm 24 sülen tesüsa Tenla ki asütsü temelaba angu



July 18, 2024: Indonesia linük nung HKBP Binjai Baru Arogoi Tenla ki ka asütsü temelaba meshiba sülen küm 24 shi aruogo aser tang tesüsa Tenla ki asütsü atema temelaba nguogo, ta International Christian Concern (ICC)-i metetdaksü.

Binjai nung Mayor, Drs. H. Amir Hamzah teyari ajanga Khristantemi Tenla ki asütsü atema temelaba angu.

Tesüiba küm 20 dak tali HKBP Binjai Baru Arogo nung züngsemtemi khenpiga atema asüba kiojen ka nung tekülem sentong agia aruogo. Tzüngluruwa mongpu nungbo

atem nungji lishi tzü atsüngdener aser meiwa mapang nung injung kilem nung anü puloka tatsük agi awanger ta tamangertem kanga timtema aruogo.

2000s nung Arogoi Tenla ki asütsü atema kimong ka alizükba sülen Tenla ki asü tenzüka liasü, ajisüaka Tenla ki tesüdak mapang nung kettangsertemi kangshia Tenla kiji bendokdaksüba ajanga Arogoi rupiah sen billion 1 shi takoksa ngua liasü, ta ICC-i metetdaksü.

Kiyong nung alir Muslim nungertemi Tenla ki asübaji anema ola adokba ajanga Arogo

nem Tenla ki asütsü atema permit magütsüi liasü.

Tatamsa Mayor Hamzah-i Tenla ki asütsü atema Arogo nem temelaba agütsüogo. Pai temelaba agütsüba dang masü saka Tenla ki asütsü atema tenla-a agütsü.

Tenla ki asütsü atema lung azüngtsüba sentong nunga Mayor-i shilem agia liasü.

HKBP Binjai Baru church construction committee nung secretary, Marringan Silaban-i, "Mayor tasenba meshimdang taküm October ita nungbosa Tenla ki asüba renemtsü atema onoki nükjidong yur inyaker," ta metetdaksü.

ANOGO ABEN TSÜNGREM DEN

TSÜNGREMER TASHI

Idangji KIBUBA miji alu, aser tekülemdak lung, sing, ali aser külentzü nung tzü ajakji menakrepa arong. 1Chubatem 18:38

Tejen Lai mapang Yihova Tsüngremi pa nüburtem den jakdaka mapa inyaka liasü. Ahab chuba aser tebuttsü Yezebel i Baal Tsüngrem yanglua Israel lima tesem ajak nung külemdaksü. Ano Yezebeli Tsüngremi jatetba ainkarte tepset. Iba yongji Elijai sarasadem aser Israel madak küm asem ser ita terok tzünglu khenyongi maru. Kodang Elija chuba aser nisungtem dang, "KIBUBAji Tsüngrem süra pa sülen anidakang aser Baal süra, pa sülen anidakang" ta ashi Anungji Elijai chichiba Tsüngrem metettsü asoshi mi ag tendangtsü jazük. Elija pa kisüng aser Baal ainkartem noklang pezü ser tenem, aser Ashera ainkartem noklang pezi pei-peit süngrem dang sarasadema mi jazük. Baal aser Ashera ainkartemi sarasadema melangzü. Saka kodang Elijai sarasadem, KIBUBA miji alu aser tekülemdak lung, süng, ali aser külentzü nung tzü ajakji menakrepa arong. Tsüngremi pa shitakba Tsüngrem ta bendanger tsüngrem külemertem dang kuli tejangja sayu.

Tanü alima renlokba mapang, tamangba, sobaliba aser liba liro ajak meyokteper, kati ka na ajizükteper, aika masüngteti aliba tensa ka nung lir. Khristan ka ama aseni tanga tamangba yimsü amanger ka dang asen tamang takang aser tamangba yimsü kuli sütetsü asümasü?Tsüngremi agizüktettsüsi amangteta lir ma? Elija-i Tsüngrem dak tasü ita amang aser iba tamang agi Kotak nungi mi jazüka Baal aser Ashera ainkartem madak takok angu. Aseni asen Tsüngrem shitakba kuli südi. Amen.

Turkey nung Tenla ki asütsü atema Arogotem nem temelaba magütsür

July 18, 2024: Turkey nung Protestant Khristantem asoshi 2019 kümDiyarbakir Protestant Church Foundation tenteta liasü, ajisüaka Tenla ki tasen ketdangsertemi parnok nem temelaba magütsür.

Khristan 100 dak tema Arogoi temelaba meshi saka kettangsertemi temelaba magütsür, ta ADF International-i metetdaksü.

ADF International nung Advocacy for Global Religious Freedom Director, Kelsey Zorzi-i, sorkari Arogo bendangshidanga züngshiba ya meimchir temeden anema lir aser Turkey-i international tenangzükba agia aliba anema inyakba lir, ta aitsü.

Turkey nung ADF International atema tongti

attorney, Orhan Kemal Cengiz-i, "Turkey nung ozüng ajanga melaba tekülem ki yanglutsüji tongtibang tebilemstü ka lir. Iba tebilemstü onük ya meimchirtem temeden, talisa yimsü temeden anema inyakba lir," ta metetdaksü.

"Tia maka linük nung Khristantemi tekülem ki tasen ka asütsü asoshi temelaba angutsü atema kanga tasak aser Khristantemi legal tsütsülen nungi tetsükdaksü aika ajurur," ta paisa metetdaksü.

Turkey nung nütsüng teimbaka Muslim nungertem lir aser Khristan nütsüngbo 170,000 shi dang lir. 2018 küm nungi tenzüka kettangsertemi linük security tenüng amer linük nungi Protestant pastor tem

asir missionary tem 180 bo meindokogo.

AO OSHI ANGAZÜKDAK: TANÜ ANGAZÜKTSÜBA OJANG



Tajungshi

(n) tajung akümtsü ashiba o (exhortation)

* Tebu teditemi lanurtem dang teti tajungshi o ashitsüla.

Tajungtazü

(adj) tebang agi meshitetba tamajung (hopeless)

* Mapa meinyak ser takar akümbaji tajungtazü masü.

OLONG PAITEP # 6849


	1			2	3			
4			5					6
					7			
	8							
	9		10			11		
					12			13
14								
					15			

TIPLEN	LANGTSÜNGLEN
2. Sü jeplok - (4)	1. ____ i - (4)
4. O agi merenshi - (5)	3. Kasa masü - (6)
7. Ayongküm li - (5)	5. Nüchi masü - (5)
8. Chiyungtsümapang süiadok - (4)	6. Tashi endok - (5)
9. Tsüngrem den jembiba - (9)	9. Langtem - (5)
12. Saklok - (4)	10. Anü malidang - (6)
14. Samaba mebushitet - (5)	11. ____ kibur - (5)
15. Mejanga onü - (5)	13. Tebur tembar tsüngda jatepba - (4)
16. Tzü shiruru ka - (4)	

OLONG PAITEP # 6848 TELANGZÜBA

TIPLEN :	LANGTSÜNGLEN :
1. Semtu, 3. Lepko, 5. Bilem, 8. Ulu,	1. Sayu, 2. Teb, 4. Kimong,
10. Tsüngpang, 11. Tesangwa,	6. Lungkak, 7. Milak, 9. Zünga,
13. Aoksa, 15. Putir, 16. Yipru.	10. Temopu, 12. Walu, 14. Ali.

NAI-A YA METETTER MA



India nunger nungtugu cricket asayar Virat Kohli-i Bollywood superstars Shah Rukh Khan aser Ranveer Singh na ajateta India's most valued celebrity kumogo. Kroll's Celebrity Brand Valuation Report 2023 ajanga ashiba agi, Kohli indang brand value shilem 29 agi timba kuma USD million 227.9 jungogo. Iba ajanga pa India's most valuable celebrities list nung temaba jenjangi tuogo. Iba list nung tanabuba jenjang nung Ranveer Singh aser tasembuba nung Shah Rukh Khan lir. List nung Akshay Kumar aser Alia Bhatt na pezububa aser pongububa nung lir.

Chandigarh-Dibrugarh Express train lenrüi ao; nisung 4 asü



Gonda, Chiteni/July 18

(Agencies): Brehostibarnü 2:35 ako meta Chandigarh-Dibrugarh Express train Uttar Pradesh kubok Gonda aser Jhilahi na yongtsü nung Pikaura anasa lenrüi oa mekupok.

Train nung coach kar lenrüi aoba sülen train nung mena alir pezü asü aser ishika yirua liasü.

Train number 15904 ya Chandigarh nungi Assam kubok Dibrugarh-i oya aliba mapang iba lendong ataloka liasü.

Jhulahi railway station atongtsü kilometer ishika dang anunga lia train indang AC compartment coach pezü lenrüi aoba sülen iba lendong ataloka liasü.

Iba tatalokba ajanga train nung mena alirtem aika aoksadaksüogo aser noksa aser video balala ajanga

nüburtem aika parnok khu bener train lenmang anasa nokdaka aliba nguogo.

Tekümzüka maparen inyakdar aser lendong agi kongshir alirtem nem teyari agütsütsü atema team ka yokogo.

Train tsükokba tesem nungi video tem sayuba nung passenger tem meküboka aliba coach temi nungi parnok indang oset agizükba aser passenger tem coach tem kolak nung nokdaka aliba sayuogo.

Iba tatalokba dak sendakba nung Assam chief minister Himanta Biswa Sarma nem osang agütsüogo aser ketdangsürtemi tensa kanga junga asadanga atadar.

Uttar Pradesh chief minister Yogi Adityanath-i, ketdangsürtem dang teyari

agütsüba maparen takaratiba nung inyaksü aser yirur alirtem temang mapang shitak nung anepalutsütsü tetuyuba agütsüogo.

Kasa mapang nung railway medical team iba tesemi oa tenüngdakba teyari balala agütsüogo.

Northeast Frontier Railways (NFR)-i, kinunger aser medemertem atema item helpline number tem agütsüogo: Commercial Control: 9957555984

Furkating (FKG): 9957555966 Mariani (MXN): 6001882410 Simalguri (SLGR): 8789543798 Tinsukia (NTSK): 9957555959 Dibrugarh (DBRG): 9957555960

Train kodaser lenrüi ao, iba indang tang bushisüngdang südar.

HYC-i Meghalaya nung ILP benoktsü bangjemshi

Shillong, Chiteni/July 18

(Agencies): Hynniewtrep Youth Council (HYC)-i, Meghalaya-i bendanger senoka aiba nokdangtsü atema jenjang agitsü asoshi Centre aser Meghalaya sorkar naprongla maneni nongshitsü bangjemogo, kong inner line permit (ILP) aser Meghalaya Residents Safety and Security Act (MRSSA) naprongla densema lir.

HYC tir Roykupar Synrem-i ashiba agi, "ILP aser MRSSA naprongla ya anti-influx mechanisms tongtibang lir, saka lenla ajak nungi takhangba agüjaka Meghalaya nung tang tashi

mebenoki lir."

"State-i bendanger senoka aitba sorkari menokdangtetba ajanga state nung aliba nüburtem aser talisa lanurtem kanga tezü adanger aser meit adoker," ta Synrem-i ashi.

Synrem-i ashiba agi, HYC-i, Meghalaya nung ILP tangsa tang benokdaksütsü atema Centre nongshitsü atema Meghalaya sorkar tali nongshitsü.

Paisa, HYC-isa Meghalaya Residents Safety and Security (Amendment) Bill, 2020 benoktsü atema Meghalaya sorkar nongshia arudar, koba bendanglen nungi state-i nüburtem aruba asadangtsü

atema lir.

Bendanger senoka aitba nokdangtsü atema inyakyim tapet benoka maliba ajanga lisopurtem dak kongshiogo, ta Synrem-i ashi.

"Onoki state sorkar dang lisopurtem socio-economic aser political tejangrabatem kümzüka ayutsü atema ozüng, policy aser inyakyim benoktsü akhanger," ta pai ashi.

Iba den bendenloksema HYC tir-isa, Meghalaya sorkar dang India Constitution eighth schedule nung Kashi nunger oshi takaratiba nung benokdaksütsü atema Centre dang mepeshitsü ayongzüko, ta ashi.

Manipur Police-i Imphal nung bomb ana defuse sütsü

Imphal, Chiteni/July 18

(Agencies): Manipur police bomb expert temi taoba ghonda 24 tsüngda Imphal West district kubok tesem balala nung bomb ana tokja aliba putetogo, ta ketdangsürtemi Brehostibarnü metetdaksü.

Manipur police department nungi bomb detection & disposal squad team kati, Government of Manipur, Planning and Development Authority secretary'er kishi nung mejangjaba nisungtemi hand grenade ka tokja aliba nguteta liasü.

Brehostibar anepdang osang angazükba sülen bomb expert tem iba tesemi aritepa

ao aser Manipur Legislative Assembly anasa Chingmeirong Mamang Leikai tesem nung amenoka aliba iba kidang nungi bomb meshizüka liasü.

Kasa mapang nung Bodhbarnü nikongtsütsü 5:10 ako shia nung Imphal West district kubok Lairenjam Awang Leikai tesem nung college principal kaer kidang nungi kasa bomb expert temi hand grenade ka nguteta liasü.

Mejangjaba nisungtemi Kamakhya Pemton College Principal Dr Wahengbam Nimai'er kidang hand grenade ka tokja liasü.

Kidang staircase nasa table

ka nung bomb toktsüba sülen item mejangjaba nisungtem ya jena ao.

Bomb toktsüba mapang Dr. Nimai ya college nung liasü.

Bomb expert temi Imphal West district kubok jana bendenba tesem ka nung bomb ya takok ngua defuse sütsüogo.

Police-i ashiba agi, bomb kechiba toktsü iba ken o tang tashi mejangjai lir.

Iba dak sendakba nung police temi ken o balala benokogo.

Telungpurtem mesüra nisung shingaiya bomb toktsüba indang tang tashi nung nangzüka mali.

Israel parliament-i Palestine statehood magizüksü lemtet

Tel Aviv, Chiteni/July 18 (Agencies): Israel indang parliament nung Palestine linük ka tentettsü khenyongi magizüker ta pangzüng ka renema liasü.

Brehostibarnü Israel parliament, Knesset nung iba pangzüng bhukuma vote 68 aser anema vote toku agüja liasü.

Palestine linük ka kumtetba ajanga Israel aser yangji aliba nübürtem nem maneni lendong agütsütsü, Israel-Palestine rara tatem makai aotsü aser region raksatsü ta parnoki ashi.

Iba pangzüng ya Ato Kilonser Benjamin Netanyahu indang coalition den far-right party temi co-sponsor süa liasü. Opposition lenir Yair Lapid'er centre-left party-i iba sangdong meyaritsü mechi senden yutsür ao. Taoba mapangbo Lapid-i 'two-state solution' ajungtsü ta shia liasü.

Palestinian National Initiative indang secretary-general Mustafa Barghouti-i iba pangzüng agizükba aija liasü.

"Government aser opposition nungi Zionist party katia iba pangzüng anema vote magütsü," ta pai social media X nung zülutsü.

"Iba pangzüng yagi Palestine nunger den yimjung magizükba sayur aser Oslo agreement süogo ta sangdongba lir," ta Barghouti-i zülua liasü.

Oslo Accords ya Palestine aser Israel lenirtem tsungta 1993 küm mezüng zülutep, kong Palestine aser Israel linük külenlen alitsü shia lir.

Ajisüaka Israel-i maneni policy balala yanglua occupied West Bank tesem ajunga nung Palestine nunger li nung illegal

settlements yanglua aser Gaza tesem ajaklen mokdanga aru.

Palestinian Authority ketdangsür Hussein al-Sheikh-i social media nung iba pangzüng ya aitsü aser Knesset-i magizükba ya international law aser international legitimacy züngshia maliba sayur aser tatem maka amokbanga alitsü merangba tasa lir, ta ashi.

Jordan indang Ministry of Foreign Affairs-i iba pangzüng agizükba ya international law nung aibelenba timtem tulu lir ta ashi.

"June 4, 1967 den lirumedema aliba Palestine indang samatsütsü makokba independent aser sovereign state Israel-i tanen makai samatsütsü merangba aser occupied Jerusalem par linük yimtiba ama aliba ajanga region nung security aser yimjung bener marutsür," ta ministry indang odongtar Sufyan al-Qudah-i ashi.

"Ibai mapang tatsüka atema dang alitsü aser iba sülen Hamas-i Palestine linük ya agir radical Islamic terror base ka kumdaktsütsü aser Iran-i aniba axis den teka amteper State of Israel samatsütsü atema inyaktsü," ta pangzüng nung shia lir.

Tang Palestine linük ka kumtetba ajanga kiralongrar atema sempet ka asütsü aser Hamas aser par yarirtemi iba ya takok angu ama ajungmesotsü, ta ashi.

Ajisüaka Knesset atema iba telemtetba ya tang tasen masü kobai taoba mapanga Palestinian statehood magizüki liasü.

Spain, Slovenia, Norway, Ireland aser danga linüktem

densema linük aikati Palestine ya linük ka ama agizükogo.

Taruba hopta Washington, DC nung Netanyahu-i United States Congress nung jembitsü imlaa alidang iba pangzüng ya renemer. Israel PM-i Congress nung jembitsü sentong yangluba mechi Democratic Party ozüng yanglurtem tsungta telemsa adokdaksü, shirnoki Israel-i Gaza nung raraba atema aitsür.

Occupied West Bank nung Israel indang sentong ya gi two-state solution nükla samadaksür, ta United Nations Secretary-General Antonio Guterres-i Bodhbarnü ashi.

Administrative aser legal steps ajanga Israel-i West Bank indang geography melenshir, ta Guterres-i ashiba pa indang chief of staff Courtenay Rattray-i UN Security Council senden ka nung zünga ashi.

"Tang inyaksangshi ajanga two-state solution atema teimla makai kumdaktsür. Asenoki yimya melenshitsuila. Settlement inyakyim ajak tangsa anentsüla," ta pai ashi.

Settlements ya international laws nung aibelenba lir aser Palestine nunger den yimjung asoshi tetsükdaksü lir, ta UN tekolakbai ashi.

October 7 nü Hamas telungpuri Israel south tsütsü amakba sülen Israel-i Gaza Strip amakba nung Palestine nunger 38,848 tepsetogo, ta Gaza indang Health Ministry ajanga ashi.

Iba rara tenzüker Gaza Strip nung nisung 89,459 yiruogo, ta ministry ajanga ashi.

Tesüiba ghonda 24 tsungta nisung 54 tepsetogo, ta sangdong ajangasa ashi.

Bangladesh nung kaketshir temi longkak aiter, mobile internet shibangogo

Dhaka, Chiteni/July 18 (Agencies): Bangladesh nung civil service quotas mechi kaketshir temi maneni longkak aitba ajanga mobile internet services shibangogo, aser police temi longkak aitba kaketshir dak tear gas khaloktsü.

Tan hopta linük tesem ajunga nung longkak aitba mapang nisung toku tepsetogo aser 500 dak tema yirur lir, saka Brehostibarnüa mepetmesü tesüngjemba makumer aser linük tesem timba nung ketdangsür temi mobile services shibangogo.

Junior information technology minister Zunaid Ahmed Palak-i ashiba agi, olulu balala aliba aser social media ajanga tensa mejungi kumdaktsüba mechi khen atema mobile interten shibangogo.

Tensa tajungba kumer services lapoktsü, ta pai ashi. Anogo ana tejakdang internet agütsür temi Facebook mamshitetsüsa shibanga liasü, koba longkak aittsü asoshi ayongzükba hadir tongtipang ka liasü.

Brehostibarnep police temi linük yimtiba Dhaka nung BRAC University anasa kaketshir dak

tear gas canisters khalokja liasü. Bangladesh south tsütsü rongnendak Chittagong yimti nunga tongtipangtiba highway mokdangba long agi aonba kaketshir alidaki tear gas yoka liasü.

Opposition Bangladesh National Party (BNP) teyari nung kaketshir temi linük tesem ajunga shibangtsü Bodhbar nikongdang ayongzükba sülen mepetmesü maneni lir.

Dhaka nung dokan aser office tem lapoka liasü saka yimtong nung bus tajemba senzüa liasü.

Sorkar mapa nung quota system ka anema kaketshir temi hopta aika longkak aita arur, koba agi Ato Kilonser Sheikh Hasina'er Awami League party yarirtem bhukumer ta kaketshir temi ashir.

Iba system kübok mapa asem buba ya 1971 küm Pakistan nungi nüchiso meshia raraba kinunger nem wazüka yutsür.

Nisung million 170 aliba Bangladesh nung lanur million 32 jungnüa mapa manguba tejashi kaketshir temi merit nung ajemdaker mapa agütsütsü akhanger.


Hombarnü Dhaka University campus nung longkak aitba kaketshir temi police aser Awami League indang student wing den aziüdokshia raratepba sülen tensa tamajungba akum.

Mongulbarnü longkak aitba mapang nisung trok tepset aser sorkari Bodhbarnü nungi tenzüka sorkar aser nija university tem mapang telatet makai shibangtsü aser campus temi riot police aser Border Guard paramilitary force tem yoka liasü.

Arishi küm 18 tain ka dang rubber bullets agi akha aser mozü kidangi anir maodang asü, ta police-i Brehostibarnü ashi.

Dhaka north tsütsü middle-class nisungtem aliba Uttara tesem nung Brehostibarnü raratepba mapang kaketshir ana asü, ta Uttara Adhunik Medical College hospital nung nurse kati ashi.

2018 küm kaketshir temi longkak aitba sülen sorkari iba quota system ya anenja liasü. Saka 1971 veterans kinunger temi petitions agütsüba sülen taoba ita High Court ajanga lemteta aliba agiena quota system ya tanaben benokshia liasü.



NAGALAND HEALTH PROTECTION SOCIETY

CMHIS (EP) kübok sen lakh metsü(220 lakh) tashi mozü ki nung among dang adokba sen ajak NHPS-i agutsutu ta asuba ji tai tangatetba ka lir.

Onoki jangjashitsünubaji, NHPS ajanga state government-i shimteta akaba mozü kitem den shirangertem yaritsü atema jenjang ka atakteta tangatetep ken o, Memorandums of Understanding (MoUs), yanglua lir, aser iba atakteta akaba jenjang nungji dang teyari angutsü purtem nem sen cash mamshii yaritsü atema mozü ki nem-ang atakteta akaba jenjang ta-a ji agütsütsü.

Mozü ki nem meyipa agütsüba treatment sen jenjangji angatetsü atema, teyari angurtemi <https://cmhis.nagaland.gov.in./CmhisPackage?page=3> nung reprangtsü akok aser item document tenungtem ya agizüka reprangtsü akok "Health Benefits Packages and Rates for CMHIS-Government Employees and Pensioners"

Imlibilema teyari angutsü purtemi mozü kidang yariba indangji mozü ki nem cash magutsütsü ta metetangma aser mozü kidangji sen cash meshira onoki agüja aliba timtem ashidak -phone, CGRMS link, email ama mashi ka ajanga metetdakjangma.

Temetetsü : Mozü kidangji CMHIS(EP) nung shimteta maliba osettem, takdang agiba/implant upgrades amala indangbo mozü ki jagi sen meshitsü akok.

Teyari nungdak dang, imlibilema item helpline numbertem nung onok ajatsü mesüra WhatsApp ajanga tongteprateptsü akoktsü :
8880515012, 8880515013, or 8880515014.



METETDAKTSÜR

- Electricity Act, 2003 indang Section 62 aser Section 79 (1) (d) aser Central Electricity Regulatory Commission (Conduct of Business) Regulations, 2023 read with Central Electricity Regulatory Commission (Terms and Condition of Tariff Regulations) 2024 indang Regulation 15 (1) (a) aser regulation 23 kübok North Eastern Region nung "North Eastern Region Strengthening Scheme-XIII" kübok tariff for assets jangjatsü atema petition.
- Tekalen shia aliba Transmission system indang beneficiaries ya (a) Govt. of Arunachal Pradesh (b) Assam Power Distribution Co. Ltd. (c) Manipur State Electricity Distribution Co. Ltd. (d) Meghalaya Energy Co. Ltd. (e) Power & Electricity Dept. of Mizoram (f) Dept. of Power Govt. of Nagaland (g) Tripura State Electricity Board alitsü.
- Tariff tejangja:

Name of the Asset	Asset-1
Schedule DOCO (FR)	31.03.2023
DOCO (Actual)	20.04.2024
Estimated Completion Cost (Rs in Lakhs)	42813.60
Tariff for year 2019-24 (Rs in Lakhs)	
2024-25	6001.35
2025-26	6392.61
2026-27	6326.53
2027-28	6190.03
2028-29	6041.48
- Iba tariff jangjatsü atema application copy ka applicant indang website www.powergrid.in nung inokja lir.
- Iba application nung shia aliba iba tariff indang proposals nung temelenshitsu aser tai aputsü lira, beneficiary densema nisung mashi-i Secretary, Central Electricity Regulatory Commission, 6, 7 & 4th floor, Tower B, World Trade Centre, Nauroji Nagar, New Delhi - 110 029 (mesüra Commission aliba danga office dangi) iba sangdong adoker anogo 30 tsungta shia aliba corporate office nem applicant dangi copy ka dener yoktsüla.

Place : GURUGRAM Sd/-
Date : 15.07.2024 GM (Commercial)

POWER GRID CORPORATION OF INDIA LIMITED
(A Government of India Enterprise)
Registered Office : B-9, Qutab Institutional Area, Katwaria Sarai, New Delhi - 110016
Corporate Office : Saudamini, Plot No.2, Sector-29, Gurugram, Haryana - 122001
Website: www.powergrid.in, CIN: L40101DL1989GOI038121

A Maharatna PSU

Ursula von der Leyen ano küm pongu EU tir inyaktsü

Strasbourg, Chiteni/July 18 (Agencies): MEPs tem secret ballot agiba sülen Ursula von der Leyen ya European Commission tir inyaktsü tanaben shimogo.

Strasbourg nung Brehostibarnü vote agitepba nung lai Members of the European Parliament 401 indang vote ngua liasü, koba lai nungdaka aliba dang nungi vote 41 tali alitsü.

Centre-right European People's Party (EPP) nungi von der Leyen ya 2019 küm mezüng shima liasü.

Lai ano küm pongu EU tekolakba mapa inyaktsü.

"Ibai ni atema tepela aser khenyongi balaka mapang lir," ta lai vote sülen ashi aser ibai tamang akaba temaitsü ta ashi.

Brehostibarnü MEPs tem den jembidang von der Leyen-i mitkar tsütsü senotsü tali indoka European defence akangshitsü aser tzü mopung melenshiba aziüoktsü asoshi bendanga agütsür

inyaktsü ta shia liasü.

Lai Europe nunger takum yimya samatsüba tashi anema jembi aser Parliament nung democratic forces ajunga den lungjemer inyaktsü nangzük.

"Tesüiba küm pongu tsungta asenoki kechi inyaktetsü aji sayuogo. Asenoki ano inyakti. Asenoki tashi itshitsü shimti," ta lai ashi.

Von der Leyen indang nomination ya taoba ita EU lenirtem senden ka nung agizüka liasü, saka züngsem ajakibo memulung.

Vote magitepdang lai lar centre-right European People's Party (EPP), the Socialist & Democrats, the liberal Renew and Greens teyari ngua liasü, ajisüaka parnok züngsem ajakibo la nem vote magütsü.

La anemer MEPs 284 liasü. Tang tasen tentetba aser tulutiba Patriots of Europe densema far-right teloktem la nem kümsük tanabuba agütsütsü khenyongi memulungi liasü.

Wokha nung Khelo India Centre lapokogo



Wokha nung Boxing asaya atema Khelo India Centre lapokba mapang MLA Y.M.Humtsoe den tanga ketdangsürtem tangokba noksa nung angur.

Dimapur, Chiteni/July 18 (Agencies): MLA & Chairman DPDB Wokha, Y.M.Humtsoe-i, July 18 nü Police Reserve DEF, Wokha nung Boxing asaya atema Khelo India Centre lapoktsüogo. Sentong nung o jembiba mapang MLA, Y.M.Humtsoe-i, boxing asaya atema Khelo India Centre ka amenoktsü atema Regimental School, Wokha shimba atema state sorkar aser Department of Youth Resource & Sports dang kanga pelaba lemsatsep. Paisa, iba centre ajanga district ajunga nungi lanur tejangrartem boxing asaya nung arangtetshitsü asoshi teyari agütsütsü aser iba centre ajanga nungtugu asayartem aika anitettsü imlaba lemsatsep. Maneni pai sempet aketba lanur asayartem anitettsü atema iba centre ya nungtugu centre ka kümdaktsütsü atema takokba tashi teyari agütsütsü

tenangzükba agüja liasü. Superintendent of Police, Wokha, Aotula T. Imchen, IPS-i, iba project indang jembiba mapang lanur asayartem jangjatsü atema Police Department aser Department of Youth Resource & Sports na küm pezü atema tenangzüktepba ka yangluogo. Laisa, iba mapang tsüingda centre-i junga inyaksangshira iba ya Centre of Excellence (COE) ka akümtsü ana nung lir ta shia, lanurtem dang iba facility ya süoki ia agitsü aser maangka agütsübatem takok tashi agitsü ajungshia liasü. Aotula-isa iba centre ajanga sempet tajung aketba lanurtem state, national aser international jenjang nung takok tajung ngua district nem konang tetushi bener arutsütsü imlaba lemsatsep. SP-i, teyari agütsüba aser infrastructure agüja Police Reserve (DEF) Wokha nung KIC, Boxing centre amenoktsü

atema temelaba agütsüba atema DIG dang kanga pelaba lemsatsepba den iba project asangsang kümdaktsüba nung shilem agiba ketdangsürtem ajak dang pelaba lemsatsep. Maneni lai, iba centre ya Regimental School nung amenoka liaka KIC-i agütsüba facility tem ya district nung boxing asayatsü jangraba kaketshirtem/shilem agirtem ajak atema asütsü ta shia lanurtem dang iba maangka agitsü ajungshi. Lanur asayar tajungtem bushiteta training agütsütsü atema KIC (boxing) atema permanent coach ka shimogo. Tang Wokha district kübok school balala nungi tetsür 14 aser tebur 18 training agitsü atema züngoksema lir. Iba sentong ya DYRO, Wokha K.Libemo Jami lenisüba nung agi aser SDPO, Wokha, Sangthing Khiam-i tepela o jembia liasü.

Zlatan'er jabaso AC Milan den mezüngbuba professional contract yangluogo



Maximilian Ibrahimovic

Chiteni/July 18,2024 (Agencies): Sweden nung nungtugu forward Zlatan Ibrahimovic'er jabaso Maximillian Ibrahimovic-i AC Milan den pa asoshi mezüngbuba professional contract ka yangluogo. Italy nung amendaker aliba club yagi, arishi küm17 tain Maximillian den küm asem atema tenangzüktepba yangluba jangjatsüogo aser iba tetezü pa Milan nungi 2027 küm tashi asayatsü. AC Milan-isa, arishi küm 17 tain left winger ya club indang

reserve team tasenba Milan Futuro nung shilem ka asütsü ta shiogo, shirnok third division, Serie C nung asayar. Maximillian-i 2023-24 season nung Under-18 team nungi 29 ben asayaba mapang goal asem idakja liasü. Pa tebu Zlatan ya kanga nungtugu asayar ka liasü, shiba küm 24 asayaba mapang club teku nungi asayaogo aser iba mapang club aser linük atema goal 561 idakja liasü. Zlatan, Milan nung Inter aser AC Milan naprongla nungi asayaogo aser club anaprongla

nungi Serie A title aiben benogo. Ajisüaka pa AC Milan den tesendaktep tajungba lir, kong pa career tatemlen season ishika asayaogo aser iba club nungi asaya aliba mapang arishi küm 41buba nung asaya nungi anena liasü. Pa ya Serie A puti otsü nung goal idaktsürtem rongnung tambusang lir. "Football toktsütsü mapang tongogo, saka nenokbo metoktsütsü," ta Ibrahimovic-i San Siro stadium nung pa career nung tatembangbuba asaya sülen ashi. Pai ashiba ama pa Rossoneri pur atema advisor ka kümogo aser club tarutsü jenjang ajungkettsü atema inyakdar. Ibrahimovic tang Paulo Fonseca kübok Milan pur project tasen ka nung shilem agia teyari agütsüdar aser Juventus aser Atalanta na sülen Serie C nung club indang Under-23 squad amenoktsü atema inyaktepar. Maneni pa transfer market nung Geoffrey Moncada aser Giorgio Furlani na den inyaka, tarutsü atema lanur asayar tajungtem bushia aoba nung teyari agütsüdar.

FIFA Rankings: India team 124buba nung lir

Chiteni/July 18,2024 (Agencies): Tawa asaya balala nung takok mongutei aruba sülen Brehostibarnü sayaba FIFA men's rankings nung India football team jenjang 124buba nung dang lir. Kasa mapang nung world aser Copa America champion Argentina temaba jenjang nung maneni parnok jenjang akangshiogo. 2026 World Cup Qualifiers nung Qatar aser Afghanistan na mekoki tasembuba round atema qualify mesütetba sülen June ita sayaba FIFA rankings nung India men's national football team jenjang asem asepzüka lua liasü. Taoba küm December ita nungi India team rankings nung maneni asepzüka ludar. Parnok taoba küm top 100-i ia 99buba tashi atu, saka iba sülen parnok asepzüka ludar. Asia nung Lebanon, Palestine, aser Vietnam nung sülenang India team jenjang

22buba nung lir. Copa America akokba sülen Argentina team Rankings nung temaba jenjang nungi masetshii jenjang yanglushiogo. EURO 2024 nung semifinal tonga asayaba sülen France team Argentina sülen tanabuba jenjang nung lir. Tawa Euro asayamung akokba Spain team jenjang pongu tejakdangi tua tang tasembuba nung lir aser kasa mapang nung Euro final tonga asayaba England team jenjang ka tejakdangi tua tang 4buba nung lir. Parnoki Brazil ajatetogo, shirnok jenjang ka asepzüka lua tang 5buba nung lir. Belgium team top five nungi tugua tang trokuba nung lir aser Netherlands aser Portugal na 7 aser 8buba nung lir. Copa America final nung tamakok nguaka Colombia team jenjang asem tejakdangi tua tang 9buba nung lir aser parnok top 10-i iogo.

AFC Women's CL: Odisha FC Jordan & Singapore Club tem den ata lir



Chiteni/July 18, 2024 (Agencies): 2024-25 AFC Women's Champions League preliminary stage nung Odisha FC Group B nung Etihad Club (Jordan) aser Lion City Sailors FC (Singapore) na den ata lir. Iba asayamung atema Brehostibarnü Kuala Lumpur nung draw süa liasü. Odisha FC ya 2023-24 Indian Women's League champions lir aser parnok preliminary stage asayatsü atema Jordan-i aotsü, koba August 25 nungi 31 tashi centralised league format nung asayatsü. Preliminary stage nung club terasem asayatsü, koba telok pezü küma lemsar asayaba angutsü. Telok pezü rongnung ka nung team pezü alitsü aser asem nung team asemsem alitsü. Telok pezüprongla nungi takoker, 12-team group stage atema qualify süa-a indang indanga qualify süa aliba team ti den asayatsü. Odisha FC preliminary stage nung temaba jenjang nung tembanga taruba group stage

atema qualify süa parnok Group C nung Urawa Red Diamonds Ladies (Japan), Taichung Blue Whale Women's Football Team (Chinese Taipei), aser hosts Ho Chi Minh City Women's FC (Vietnam) den asayatsü. Group stage nung telok asem nung team pezü alitsü aser iba ya-a October 6 nungi 12 tashi centralised league format nung asayatsü. Club tem ya parnok indang member association rankings dak ajemdaker draw atema inoka liasü. Telok ajak nungi temaba jenjang nung tembanga team ana aser tasembuba jenjang nung tembanga team tajungtiba quarterfinals-i aitsü, koba 2025 küm March 22 aser 23 nü asayatsü. Quarterfinals masaya tsüingda knockout round ka asayatsü, koba single-leg format nung asayatsü. Iba sülen semi-finals aser final 2025 küm May 21 nungi 24 tashi asayatsü, koba single-leg ties yimya nung asayatsü.

BILEMDANGANG
 "Tejakleni aotsü atema tenzüktsü kanga tongtibang."